



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima




tir yimiyim

TAPAK 8

US-i Ukraine nem ano military teyari talila agütsütsü

Leicester-i Palace forward Ayew alizükogo



VOL. XXI ISSUE NO. 312 (ADOK 312)

DIMAPUR AMUNGNÜ (SUNDAY)

LUROI (AUGUST) 25, 2024

₹ 5.00

NBCC-i tanü NLTP Act atema sarasademtsü ayongzüker

Dimapur, August 24, 2024 (TYO): Nagaland Baptist Church Council (NBCC)-i arogo ajak nung asung August 25 Deobar tekülem sentep nung Nagaland Liquor Total Prohibition (NLTP) Act of 1989 atema sarasademtsü ayongzüker.

Nagaland sorkari NLTP Act of 1989 meyipa reprangshitsü aser iba ajanga tesem kar nung tenokdangba agientsü akok. Iba ya kanga dang süoki ia bilemstüba khuret ka lir anung tamanger ajaki iba atema sarasademtsüla ta NBCC General Secretary Rev. Dr. Zelhou Keyho-i sangdong ka nung ashi.

August 27-29, 2024 Nagaland Legislative Assembly indang session nung tesem kar nungi NLTP Act agientsü atema

jembitsü akok ta sorkari shiogo. Tawa cabinet senden ka amenba sülen Power & Parliamentary Affairs aser government spokesperson KG Kenye-i iba indang olen ka shisema lir.

NLTP Act meyipa reprangshitsü nungdaker kechiyong iba Act benokba khen danga memelenshi. Yi noktangtsü tangatetbaji tajung saka iba ajanga yi ajemba mazüokteter, ta Kenye-i osangbener dang shia liasü.

Nagaland nung yi noktangba ajanga ozüangi alcohol market adok aser parnokki sen aika ajangzüka shishilembar ta paisa ashi.

NLTP Act ajanga tesüiba küm 30 tema Nagaland ya "dry state" ka ta züngshia arur aser iba Act yanglushitsü akok ta asüba ajanga o atsütepa arudar.

ARESA küm 51 buba ajungba sentong agi

Kohima, August 24, 2024 (TYO): Assam Rifles nung ex-servicemen, parnok kibongtem aser veer naris yaritsü kechiyong nenok 'soldier family' lir ta Inspector General Assam Rifles (North) Maj Gen Manish Kumar-ashi.

August 24, 2024 nü 13th Assam Rifles, Kohima Garrison nung Assam Rifles Ex-Servicemen Association (ARESA) Kohima küm 51 buba ajungba sentong nung jembidang pai iba ya ashi.

"Tang teinyakdak sepaitemi ex-servicemen aser parnok kibongtem nem kechi tagütsütsü lir agütsütsüla. Sepai nungbo azü agi sendaktepba

dang nungi asenok tsungda tesentaktep takangba lir kechiyong asenoki külem nukjidong atema bendanga agütsür" ta Maj Gen Manish-isa ashi.

"Tang sepaitemi teinyakdapur ajak asung ex-servicemen akümtsü aser tanü sepaitemi ex-servicemen dang pelatsüla. Ex-servicemen nem facilities balala agütsüba aser schemes inyakba ya parnokki sepaitemi asüadang aazükba lir" ta paisa ashi.

Paisa ARESA Kohima küm 51 buba ajungba atema tenüngsang tulu agütsü aser tesüiba nung sepaitemi inyaker, parnok kibongtem, veer naris aser tanur ajak dang pelaba metetdaksü.

'Dr Imkongliba Ao Martyrdom Day' among



Dimapur, August 24, 2024 (TYO): August 24, 2024 nü Raj Bhavan, Kohima nung 'Dr Imkongliba Ao Martyrdom Day' mongogo.

"Dr. Imkongliba Ao ya mangdang aketba lennir ka liasü aser küm 60 tejakdang pai Nagaland tarutsü nung yimjung aser azükaru angu" ta Nagaland Governor La Ganesan-ashi.

"Iba mapang pa arshirtem aser toktepertemi pai ayuba mangdang agizük asübo tanü asenok jenjang tajungba ka nung lila" ta pai ashi.

"Naga nunger ya sempet aketer dang masü saka India nung tanga kintem ama tarutsü

asoshi bilemertem lir. Anungji Nagaland ya linük nung tanga state tem ama renloksüla ajisüka Dr. Imkongliba Ao ama tetenzükertem aser mangdang aketba lennirtemi ashi mangaba agi tanü asenoki tangar memenep lir" ta Governor Ganesan-ashi.

"Asenoki linük nung model citizens ama alitsü merangtsüla aser yamaji asü nung dang Dr. Imkongliba Ao amala nisungtem semmang tajung teti taküm alitsü" ta paisa ayongzüker.

Iba sentong nung Joint Secretary to Governor Mhomo Tungoe-i Dr. Imkongliba Ao indang otsü tatsüka lemsatep.

Diphupar Village Council-i public rally ayongzüka agi



Dimapur, August 24, 2024 (TYO): Diphupar Village Council-i tax saruba, tashiyim agi sen meshiba, nisung pur aoba aser nisungtem amokmerenba anema Honibarnü public rally ka ayonga agidang nisung noklang aikati shilem agiogo.

Naga National worker kati Diphupar nung youth president aser civilian ka prangpong amer amokmerenba anema public rally ayongzüka agi. Iba telungpur yagi aiben Diphupar nung ozüng alema mapa inyaka aru aser osang angazükba agi pa police-i pua lir.

Tanü lungkak aitertemi Airport junction nungi Green park junction tashi banners aser placards amerjaja aser tatem nung Agri Expo site nung sentong tembang.

DVC-i ayongba public rally nung telok balala nungi lennirtemi

o jembi aser idangji parnokki tatalokba aitsüba den ozüangi melaba ama temeten agütsütsü takhangba agütsü.

"Nagaland ya tax saruba lima ka kümogo aser telungpur telok 25 nungi 26 shi kati metetsümong tax sarur. Tawa dokan kibur ka pur aoba aser Diphupar Naga Youth Organization (DNYO) president amokmerenba ajanga Diphupar nung alirtemi ola adoktsüsa aküm" ta DVC Chairman Ghuzui Shohe-ashi.

"Diphupar nungi captain Kahovi Chishi aridokogo aser tarutsü nunga ozüng alema inyaksangshiba magizütsü" ta Shohe-isa ashi.

"Naga nungeri ozüng alema inyaksangshiba atema süoki ia bilemstüla aser iba khuret ya Diphupar nung dang ataloker masü" ta Diphupar Naga Women

Organization Chairperson Khriezovenuo-ia ashi.

Tashiyim mapa inyakba nisung anema National Security Act 1980 kübok ken o benoktsüla aser telok mesüra kija kari danga aibelener nem bail agütsütsü merangra parnokki tebilemstü khuret abentsü ta DVC-i Chumoukedima Deputy Commissioner dangi memorandum ka zülüogo.

Tanü rally nungsa Diphupar village telongtet nung prangpong bener mesenzütsü aser ceasefire ground rules akangkanganga bentsütsü atema bangjemtep.

Lungkak aitertemisa "Sorkar Ka, Saru Ka" policy tenzütsü atema nenshia metetdaksü.

Iba ajanga sorkar ka kübok tax collection aser administration alitsü aser tax system tezüpapa akümtsü ta parnokisa ashi.

Kaketshir 108 nem CM Meritorious Students Fellowship agütsü

Dimapur, August 24, 2024 (TYO): August 24, 2024 nü Capital Convention Centre, Kohima nung Chief Minister's Meritorious Students Fellowship sempet agütsüogo.

Iba sentong nung HSLC 2023 aser 2024 batch nungi kaketshir 108 nem kulikakettem den senpettem agütsü.

"Iba takok tulu anguba asoshi kaketshirtem den parnok tsüraburtemi bendanga agütsüba atema tenüngsang agütsür. Takok anguba ya nenoki meranga azüngba aser bendanga agütsüba ajanga lir aser tarutsü nunga nenoki state asoshi konang bentsür arutsü imlar" ta School Education & SCERT Advisor Dr. Kekhrielhoulie Yhome-ashi.

"Taküm ya NBSE tenteter küm 50 abensaba atema benjung amongba küm lir. Department temi education system tajungba akümtsü merangtsüla aser asen kaketshir nem alima tadem den janyu medemtsüsa shisatsü agütsütsüla" ta Advisor Yhome-ashi.

"Takok angurtem teimbaka jila nung alirtemi lir anungji tanü asenok jila nung alirtemi ajangshiba ya yimdak alirtemi ajangshitsü ano mapang talangka lir. Yimtsüngtem nung basic infrastructure mesüra better education agütsütsü atema tayongzüka jenti lir anungji asenoki item maongkatem anguba kaketshirtem asoshi bilemstütsüla aser ano linük nung highest dropout ji Nagaland state lir" ta

Yhome-isa metetdaksü.

"Chief Minister's Meritorious Students Fellowship ajanga state sorkari Nagaland nung shisaliok jenjang ajungkettsü mapa inyakba sayur" ta NBSE Chairperson Asano Sekhose-ashi.

Iba fellowship ya NBSE-i ketdangsüa agiba HSLC Examination nung top rank nung adenba kaketshir 50 nem agütsür. Kaketshir 50 ya Indigenous Scheduled Tribe of Nagaland nungi asütsüla aser iba fellowship angur nem kulikaket den senpet agütsür ta Asano-isa metetdaksü.

CMMSF indang grant ya küm 5 atema agütsütsü aser kaketshirtemi fellowship angutsü atema küm shia grades classes nung 80% marks tema angutsüla ta laisa ashi.

Nagaland nung PMKSY 2.0 projects reprangdangogo

Dimapur, August 24, 2024 (TYO): Nagaland nung Pradhan Mantri Krishi Sinchayee Yojana-Watershed Development Component (PMKSY-WDC 2.0) projects aser springs rejuvenation works inyakba reprangdangtsü atema Centre nungi ketdangsürtem aru.

Deputy Adviser (Forestry) S.K.M. Guite, Department of Land Resources, Ministry of Rural Development New Delhi nungi Research Investigator Abid Hussain aser Himmoththan Society, Dehradun nungi expert Vargish Bamola nungeri Nagaland semdang.

August 22 nungi 23, 2024 tashi parnok den Nagaland Department of Land Resources ketdangsürtemi Kohima aser

Peren district tem nung mapatong inyakdak semdanga liasü.

Centre nungi arurtem den SLNA Nagaland aser Land Resources ketdangsürtemi Thizama nung Springshed management work reprangdang. Iba mapa ya PMKSY-WDC 1.0 kübok inyaker.

"Ministry aser Department of Land Resource-i Thizama nung springs rejuvenation works ajanga kilen 200 shi nem tzü tajemtsü agütsüba atema pelar" ta Thizama village Head GB Neizelie Zatsu-ashi.

Public Health Engineering Department (PHD) Nagaland nung JJM Scheme kübok pipelines aser water storage tanks agütsü ta Department-ia metetdaksü.

Centre nungi aruba ketdangsürtemisa Zhadima nung Percolation tanks, bench terraces, Banana plantation aser Coffee plantations aser Tsiesema nung Naga Tribal Coffee indang coffee processing plant semdanga liasü.

"Zhadima nung Water Harvesting Structure project ajanga aluyimba maparen tajungba akümtsü aser yimdaklir rongsenketzüng ajungkettsü" ta BigLife Farm, Zhadima kibur Vizosielie Khoubeve-ashi.

Ministry ketdangsürtemisa Peren district kübok Gaili Namdi village aser Inbung village semdang aser idakji springs rejuvenation works aser natural resource management works reprangdang.

NVBDCP-i Mkg nung monitoring sentong ayongzüka agi



Senior Regional Director of Imphal, Dr. L.A. Singh den NVBDCP staffs temi Aliba yimtsü nung LLINs amshiba asadangba noksa nung angur.

Mokokchung, Luroi/August 24 (TYO): National Vector Borne Diseases Control Programme (NVBDCP)-i, August 23 aser 24 nü Mokokchung district nung district monitoring sentong ka ayongzüka agiogo.

Senior Regional Director Imphal, Dr. L.A. Singh den Deputy Director NVBDCP Dr. Tinurenla Anichari, state consultants, district consultant, Malaria Technical Staff, aser Surveillance Workers (SW) temi, Longkhum nung Primary Health Centre, Ungma nung Primary Health Centre, Dr. Imkongliba Memorial District Hospital, Health Sub-Centre Mokokchung village, Aliba yimtsü nung office of the Chief Medical Officer aser Lenjem Hospital densema tesem balala semdanga liasü. NVBDCP aser Non-Communicable Disease programme tem benoka inyakba asadangsü atema iba sentong ya agia liasü.

Medical staff tem, district NVBDCP personnel aser

ASHA tem den sensaksemba mapang, Dr. Singh-i, ramen tashidak prokshia meyoktsü atema mapang shitak nung putettsü koda tongtibang iba indang lemsatop. Paisa, iba dak sendakba nung surveillance koda tongtibang iba indang lemsatopa laisü. Dr. Singh-i, ghonda 24 tsünga results agütsütettsü asünung dang blood slides bendentsü ajungshia liasü. Paisa, trained laboratory technician ka maliba tesem nungbo Rapid Diagnostic Tests amshitsü ajungshi.

Dr. Singh-i ashiba agi, shirnok tang temang meta shirangdar mesüra shirnok taoba hopta ana tsünga shirangogo, parnok dang nungi dang blood slides bendentsüla. Pai, nisungtemi parnok senzusenpongba indang osang tejangja karbo magütsü alitsü akok, anungji iba dak sendakba nung pai tanga state nungi arurtem aser aayangertem kanga junga asadangsü aser paramilitary forces den teka amteper inyaksü ayongzüka liasü.

Iba den bendenloksema pai, hopta ana tsünga khenbosa screening asütsü atema SW tem anisemtsü benoka liasü.

Shirangertem aikati sorkar facility temi masü saka private mozükitemi oner ta shia, Dr. Singh-i, ramen tashidak putertem indang jangja alitsü asoshi quarterly basis nung private mozükitem den mapangshia tongtepretepa alitsü tuyu.

Long-Lasting Insecticidal Nets (LLINs) lemtsüba dak sendakba nung Dr. Singh-i, nüburtem dang merila sü amshitsü ajungshitsü aser anogoshia stock records shitak IHIP portal nung update asütsü koda tongtibang iba indang lemsatop.

Regional Director-i ashiba agi, takümbo tang tashi nungbo dengue agi shirangertem kanga ajema lir, saka dengue tashidak ya yimya agi tzüngluruwa sülenang tali akümer ta ashi. Pai, staff tem dang kanga kümküma atatsü aser bendanga agüja inyaksü mepeshia metetdaksü.

Ungma Primary Health Centre nung Satellite OST amenokogo



Mokokchung, 24th Aug (TYO): 24th Aug, 2024 nü Ungma Primary Health Centre nung Satellite Opioid

Substitution Therapy (OST) amenokba sentong ka agi. Iba sentong ya NSACS teyari nung District AIDS Control and

Prevention Units, Mokokchung (DAPCU)-i ayongzüka.

OST ya treatment tajung ka lir, iba ajanga lendong aketba ozüng anema achiba mozümora nungi paitoka liteter. OST mozü ya tuyuba ama shitak agira ibai ozüngi melaba ka lir. OST treatment ajanga tebilemtsü aika nungi paitokteter, ta DAPCU, DPO, Makshi Jamir-i metetdaksü.

OST Satellite meshiteta sarasadem Ungma Baptist Arogo, Pastor, T. Wati Longkumer-i agi. Sentong nung Ungma putu yimsüsür, Imtidongba Jamir tatar aser Dr. Moamongla, Ayush Medical Officer nadia shilem agia liasü.



SDO(C), Sechü-Zubza Rorheu Peseyie-i anir DDMA, Kohima aser Dzüdza Village Council nati August 24 nü Dzüdza yimtsü nung taolen makai aliba truck anishirtem nem chiyongtsü lema agütsüba mapang tangokba noksa nung angur.

PM SVANidhi Scheme Annual event Kohima nung agitsü

Dimapur, Luroi/August 24 (TYO): State Urban Development Agency Government of Nagaland-i ayongzüka, PM SVANidhi Scheme takoktem asoshi tetushi agütsüsü atema Annual event ka ayongzüka agitsü.

Iba sentong nung Commission & Secretary, Urban Development & Municipal Affairs Department, Kekhrievor Kevichusa (IPoS) alakteta jaoker asütsü, koba August 28 nü 10:30 ako nungi tenzüka Capital Convention Centre New Secretariat, Kohima nung agitsü renema lir.

Prime Minister Atma Nirbhar Nidhi (PM SVANidhi) Scheme ya Centrally Sponsored Scheme ka lir, aser iba atema Ministry of Housing and Urban Affairs-i senotsü teyari agütsür. Iba scheme kübok 2020 küm June ita nungi tenzüka financial institutions tem ajanga tetemlok kanga ajemer, lendi nung yokyatsüyartem nem parnoki tuzüksüsa loan agütsüsü asoshi Special Micro-Credit facility agütsür.

Iba dak sendakba nung state-i, "Utkrishtataki Ore BadhteKadam- Celebrating Achievements, Inspiring Excellence" omen nung ajemdaker PM SVANidhi scheme-i ajangzüktetbatem benjungsü atema State Annual event ka ayongzüker. Iba sentong nung ULBs aser Banks tem nem tetushi agüja PM SVANidhi Scheme kübok takok tajung angubattem benjungsü.

Sentong nung ULBS aser Banks tem nem 'Performance Recognition for Access to financial Inclusion and Street Vendors Empowerment' (PRAISE) award agütsüsü. Maneni Best Performing Lending Bank, Best Performing Bank Branches aser Over all Best Performing ULBs (category 3) ta award balala agütsüsü.

Sentong nung ULB balala kübok Councilor aser Administrator tem, District Urban Development Officers, Banks, lendi nung yokyatsüyartem aser tanga ketdangsürtemi shilem agitsü.

JKTM ketdangpurtemi Mangkolemba jila semdang



Mongkolemba, Luroi/August 24 (TYO): Jangpetkong Kaketshir Telungjem mungdang Tir-i anir ketdangpurtem, Luroi 23, 2024 anogo Mangkolemba town nung aliba Government Higher secondary school, Community Health Center aser New Model college semdanga liasü.

Community Health Center semdangba mapang Mangkolemba town aser temeküt yimtsüngtem nungi arur shirangertem infrastructure peria makaba ajanga takoksa tulu anguba kuli ngua kanga nemjema bilemer. Iba den kulemi New model college nunga classroom, library aser college ka dak sendakba osettsüset peria makaba ajanga tazünger tim atema ajitet. Ano yamaji Mangkolemba Government Higher Secondary School nung tesayurtem den sensaksemba mapang iba ama exam centre school ka nung Hall makaba ajanga tatidang mapang ana meta yimtsüngtem nungi arur tatidang agütsür tim

atema khuret lemsatop. Item rondak nüngdak tebilemtsü bener Mangkolemba ADC office nung SDO(Civil) den ajurutepeba sensaksem ka mena liasü.

Tanü Alima kanga kera ainba mapang ka nung kaketshir shisaliok jenjang bushiba mesüra shiranger tem anepalutsü asoshia osettsüset teperi maliba tensa nung Mangkolemba sub-division Headquarter ya lir, Mangkolemba town ya ana meta aliba yimtsüngtem asoshi tongtipang center ka lir, iba ama School tem, college aser Health center nung Tenüngdakba osettsüset maka, tesayur meperi, ta asüba tensa nung nüburtem tim atema ngua Kanga nemjema bilemer, ta lenirtemi ashi.

Maneni mangkolemba town dang masü saka JKTM-i mapa mapang apir jangpetkong nung aliba yimtsü nung school tema semdanga jajatsü, ta kasa sangdong ajanga metetdaksü.



Tawa Kolkata nung aliba Hospital ka nung doctor ka tashiyim amshia raksatsür tepsetba anema August 24 anepdang züngia jajazüa senzürtem telok 'Rabindra Sarovar' züngsemtemi longkak aítang tangokba noksa nung angur.

2026 küm tashi nung Maoists telungpur samatsütsü: Amit Shah

New Delhi, August 24 (Agencies): Mongolbarnü Union home minister Amit Shah leniba nung interstate coordination senden ka amenba sülen pai, 2026 küm March ita tashi nung India nung Maoists telungpurtem samatsütsü, ta metetdaksü.

Amit Shah-i, "2026 küm March ita tashi nung asenoki linük nung Left Wing Extremism (LWE) samatsütsü ta amanger," ta metetdaksü.

"Asen ama democracy linük ka nung Maoists telungpurtem tebilemstü ya tayongzükba tulutiba lir. Tesüiba küm 40 tsüingda Maoists rara nung nisung 17,000 süogo. Ato kilonser Modi-i aniba BJP sorkar centre nung amenokba sülen onoki iba ya tayongzükba ka ama agizük aser teka nung raraba hadir alirtem (Maoists) nem raraba hadir toksüdaaksütsü atema inyaka aruogo," ta Union Home Minister-isa metetdaksü.

2004-2014 kümtem den medemdangra 1014-2024 tashi nung linük nung Maoists dak sendakba rara shilem 53 ajema

kümogo, ta pai metetdaksü. "Onoki Maoists lenirtem aika tepsetogo aser Maoist-i kongshiba tesemtem nung ozüing benoktsü atema inyakba den külemi item tesem nung terenlok mapa inyaksütsü nükjidong nung rangoker inyakogo," ta pai metetdaksü.

Shah-i Maoists tebilemstü onüktem lemsateptsü atema state tenet nungi tongti ketdangsertem den senden mena liasü. Iba senden nung shilem agirtem rongnung Chhattisgarh chief minister Vishnu Deo Sai aser deputy CM Vijay Sharma, Union minister of state for home Nityanand Rai aser Chhattisgarh, Jharkhand, Odisha, Madhya Pradesh, Andhra Pradesh, Telangana aser Maharashtra state tem nungi chief secretaries aser director generals of Police (DGPs) aden.

Yaküm Chhattisgarh assembly elections nung BJP-i takok anguba sülen nungi state nung Maoists anema raraba tesashiba kümogo. Taküm küm tenzüker tang tashi nung state nung security sepaitemi Maoists 142 tepsetogo.



Ato kilonser Narendra Modi-i Poland aser Ukraine na semdangba sülen August 24 nü Delhi tonga arudang tangokba noksa nung angur.

Sorkari Unified Pension Scheme agizükogo; April 1 nungi tenzüktsü

New Delhi, Luroi/August 24 (Agencies): Union Cabinet-i Unified Pension Scheme agizükogo; iba scheme ajanga sorkar mapa inyakterem nem pensions aser family benefits agütsütsü.

Iba scheme ya sangküm April 1 nungi mapa kuma benoktsü aser National Pension Scheme mesüra Unified Pension Scheme shimsü atema sorkar mapa inyakterem nem temelaba agütsütsü. State sorkartemia iba scheme shimsü akok.

Honibarnü Ato kilonser Narendra Modi leniba nung amenba Union Cabinet senden nung Unified Pension Scheme (UPS) ya agizüka liasü.

State sorkartemi Unified Pension Scheme shimra iba scheme ajanga tajangzük angutsüpurtemji lakh 90 shi asütsü.

Sorkari ashiba agi, Arrears nung sen crore 800 shi indoktsü aser mezüingbuba küm nung iba scheme nung sen crore 6,250 shi indoktsü.

Sangküm April 1 nü iba scheme tenzüka sülen National Pension Scheme (NPS) mesüra UPS shimsü atema Central sorkar mapa inyakterem nem temelaba agütsütsü. Tang aliba central sorkar mapang inyakterem shirnok NPS subscribers lir, parnoka UPS agi melentsü atema temelaba agütsütsü, ta ketdangsertem osang ajanga metetdaksü.

Iba scheme sangdongba mapang Union Minister, Ashwini Vaishnav-i, Centre-i committee ka shimteta sülen committee jagi RBI aser World Bank densema tongtibang organization aika den senden noklang ka dak teimba amen,

iba sülen ang iba scheme atema telemteta agi," ta ashi.

"Ato kilonser Modi-i Cabinet Secretary TV Somanathan mendenbuba ser committee ka shim. Iba committee yagi organisations aser state ajak den senden 100 dak tema menogo. Ato kilonser Modi-i inyakba aser opposition-i inyakba mapaji balala. Opposition ama masü saka Modi-ibo ajak den asüingdangtepa inyaker. Reserve Bank of India aser World Bank na densema tongtibang organization aika den shisa lemsatepa senden amenba sülen committee-i Unified Pension Scheme benok. Tanü Union Cabinet-i Unified Pension Scheme agizükogo aser tarutsü nung mapa kuma benoktsü," ta Vaishnav-i metetdaksü.

Odisha nung Subhadra Yojana scheme ajanga tetsür crore 1 ajangzüktsü

New Delhi, August 24 (Agencies): Odisha nung Chief Minister, Mohan Charan Majhi-i aniba BJP sorkari tetsürtem nem tashi agütsütsü nükjidong nung Subhadra scheme agizükogo, aser iba scheme kübok taruba küm pongu tashi küm shia tetsür shia nem sen meyrjang terer (10,000) agütsütsü, ta ketdangsertemi metetdaksü.

Iba scheme ajanga arrshi küm 21 nungi arrshi küm 60 tsüingdapur tetsür crore 1 tajangzük angutsü, ta kasa osang ajanga metetdaksü.

CMO sangdong ka ajanga, "Ni iba maongka agia tetsürtem nem tashi agütsütsü atema benokba Subhadra scheme state cabinet-i agizükogo, ta sangdonger," ta metetdaksü.

"August 22, 2024 anogo nung Lok Seva Bhawan nung amenba senden nung lemtetba ama iba scheme ya 2024-25 nungi 2028-29 tashi benoktsü agizükogo. Iba mapatong atema sen crore 55,825 lemsütsü," ta kasa osang ajanga metetdaksü.

Temsüa alir tetsür shiai küm pongu tsüingda sen 50,000

angutsü. Küm shia shilem ana lemsar meyrjang pongungu anaben agütsütsü. Senji Rakhi Purnima anogomong aser International Women's Day (March 8) anogomong nung agütsütsü, ta CMO-i metetdaksü.

Maparen teladak asütsü atema senji tetsürtem indang Aadhaar-enabled single-holder (DBT) bank account nung Aadhaar Payment Bridge System (APBS) ajanga indangindanga inoktsütsü. Iba dak alia tetsürtemi Subhadra Debit Card kaka angutsü.



August 24, 2024 nü Mathura nung tetsürtemi Uttar Pradesh Police Constable Recruitment Exam agütsütsü atema tarensena nokdaka alidang tangokba noksa nung angur.

J&K election atema Mehboob Mufti-i PDP manifesto sayaogo

Srinagar, August 24 (Agencies): Jammu & Kashmir nung assembly elections agitsü hopta asem dang lia tan hopta tetenzüklen National Conference-i party manifesto sayaba sülen Honibarnü Mehbooba Mufti-i aniba People's Democratic Party (PDP)-ia party manifesto sayaogo.

PDP manifesto nung angati light tsükdaksütsü atema nangzükba densema tenangzükba aika densema lir. Osangbenertem den jembidang taoba mapang Jammu & Kashmir nung Chief Minister, Mufti-i Congress aser National Conference teloktep aitsü.

Manifesto sayaba sentong nung Mufti-i, "Arrla 370 agienba sülen Jammu & Kashmir nung tensa ano tamajungba dang kümogo. Tangbo Kashmir onük ya assembly menden lemsaba tashi ajema aluogo," ta metetdaksü.

Kashmiri Pandits den jembidang lai, PDP-i Kashmiri

Pandits taküm yangershitsü atema yaritsü aser ki tuluba agütsütsü, ta nangzük.

Laisa, tekülem kitem aser mosques nung electricity angati agütsütsü, ta ashi.

"Onoki sensotem nem ita shia electricity unit 200 angati agütsütsü. BPL kibongtem nem ration tali agütsütsü aser gas cylinders agütsütsü," ta lai metetdaksü.

NC-Congress teloktep aija Mufti-i, "Election aser menden lemsaba ya PDP atemabo tongtibangba masü. National Conference aser Congress-i onok tebilemba onüktem agizüktsü melungra onoki menden ajak nung parnok dang toktepang ta ashitsü, aser onoki parnok sülen anidaksü, kechiyong tanga onük ajak dang nungji Kashmir ya tongtibangba," ta ashi.

Jammu & Kashmir nung September 18 nungi tenzüka shilem asem lemsar election agitsü aser October 4 nü election osang sangdongtsü.



TIR YIMYIM YIMOBILEM (EDITORIAL)

DIMAPUR AMUNGNÜ, AUGUST (LUROI) 25, 2024

Tsüngrem yimli

Kotakji Tsüngrem yimli, anungji yangji Tsüngremi mulungba dang inyaker. Aji oda, Tsüngremi kechi ashir aser kechi inyaksü tenyadir kotak tenyartemi kecha nungnanga melii inyaker. Ibaji mesüka tanü asenok aliba lima nunga asenok kibong aser mapa inyakdak ajak nung Tsüngrem mulung südakjang ta Yisui ashir. Tsüngremji anüng aser ali madak kibur, Pai asenok yanglu ta asenoki amanger, saka asenoki Pai mulungba nung meliner. Aji oda, kiburi ashi mangaba kilirtemji asenok lir. Ibayongji, asenok mulungjang nung tepela malir kechiyong asenok taküm aser kibongji Tsüngrem yimli nung masü möijing yimli nung alir. Iba amaji jashia malitsü asoshi Yisui asenok dang Mathi tapu 6 nung, "Nü yimli arung, Kotak nung kechi koma lir, yamaji alima nunga nü mulung sang," ta Tsüngrem dang mepishia sarasademdaktsüner. Alemli Yisu Khrista alimai marudang Yihuda nungertemi Tsüngrem yimlji alima nung bendanger yimten yimsüsüba ajak makdoker, Jehovah Tsüngremi parnok nem yimten tashi agütsür, alima ajak ramoka Israel nungertemi yimsü asütsü ta bilema liasü. Ibayongji, kenü anogo Yisu nütsüngtemia Pa dang Israel nem kodang yimli meyipa agütsütsü ta asüngdangba Laishiba nung angur. Ajisüaka, Tsüngrem yimlji alima yimli amato masü, alima yimlibo rara asee meputep adokdaksür saka Tsüngremi yimli nungbo teti tepela aser tesünep lir. Ibayongji, anogo shia asenoki Tsüngrem dang kü mulungjangi, ozü kibongi, ozü telok dangi, ozü yimtaki mesüra onok alidaki "nü yimli arung," ta sarasademsü Yisui sayu. Tetezü, kü taküm mesüra onok rongnung kotak nung ama nai mulungba dang inyakdakjang ta Tsüngrem dang mepishitsübaji tongtibanga ta asenok nem angatetdaksür. Tanüa asenok aikati Tsüngrem yimlji asenoki manguba tasür tanülatem alidak kotak limaji danga ta bilemer. Ajisüaka, Tsüngrem yimlji asenoki manguba kotak limaji dangbo masü saka tanü asenok alidak lima aser asenok kibongtem ya lir. Anungji, idaki Tsüngremi mulungba inyaka alitsü tim. Aji oda, kodang asenoki asen taküm, kibong aser lokti ya Tsüngrem yimlia ta angatetter, idangji asenoki Tsüngremi mulungbaji kechi ta angateta inyaksü merangtsü. Yimten nunga kodang yimsüsürtemi parnoka Tsüngrem yimli nung tenzüker ta angateta yimsü südir, pei mulungba agi masü saka Tsüngrem mulungba nung yimsü asütsü. Iba kasaji arogo nung tenzükertemia kodang arogoji Tsüngrem yimlia ta angateta tenzükdir, tali tejangraba aser tajungba tenzüktettsü. Iba kasaji nisung shiai pei inyakba mapaji Tsüngrem yimli nung inyaker ta kodang angateta tenzükdir, ochimashi inyaksüba shisatsüji anasaia marutsü. Aji oda, kodang asenoki Tsüngremi mulungba inyaknua Pa dang asüngdangdir, Pai asenok dang lenmang sayutsü. Idangji asenok Tsüngrem den külemi Pa yimli nung Pai mulungba mapa inyaker tongti kaka akümtsü. Koba mapa südir süang, alima nung Tsüngremi mulungba mapa inyaka alitsübajisa jangratemtsü taketba asütsü. Aji oda, Tsüngremi mulungba inyaksübaji yimten nung asütsüa akok, lokti nung asütsüa akok, arogo nung asütsüa akok mesüra pei taküm aser kibong business nung asütsüa akok. Atangji, asen taküm nung Tsüngremi mulungba mapa angatettsü aser repringtetsübaji tasak, ibayongji Yisui asenok dang sarasadema Tsüngrem dang asüngdangtsü ajungshir. Sarasadema ajanga Tsüngremi asenok nem Pai mulungba mapa inyaksü asoshi renemtsütsü. Aji oda, asen taküm nung Tsüngremi mulungba dang inyakdakjang ta anogo shia asenoki sarasademsübaji kanga tongtibang lir. Asen aliba lima ya Tsüngrem yimli kuma alitsübaji asen taküm aser kibong nungi tenzüksüla. Idangji dang, ano asen aliba lima nung Tsüngrem yimli ulushia kümyonga aotsüba mapa nung Tsüngremi asenok amshitsü. Asenoki aiben Tsüngremi mulungba ama masü saka aseni mulungba nung inyaksü asoshi yimten aser lokti nung shilem agir, kechiyong alima nung arogo dak alaka yimten aser lokti tentetjibo Tsüngrem yimli masü amai bilemer. Ajisüaka, asenoki yimten aser lokti nungbo 'nü yimli taru, onoki mulungba dang inyakdi,' ta ashitsü makok. Iba amaji bilema inyakerkem aika laooogo aser ano laotsü, anungji asenokibo asen yimten aser lokti nung dena Tsüngrem yimli jaokdi.

OLEMSABANG

O YA TSÜNGREMLIR

~ L.Kika Pongener.

(Yashi adok nungi...)

Tetenzük nung o liasü, o Tsüngrem den liasü, o-ji Tsüngrem liasü aser Tsüngremi o ajanga dang alima rangben ya yanglu. Aser iba o-ji shi kümer Tsüngrem chir Yisu Khrista nisung sorobangro nung alimai aru. O nungji alima rangben ya meyipshishidaktsütsüsa tashi tulu keta lir. Atangji, o ajanga nisung ka taküm samatsütsü akok, o ajanga lokti nung telemsa adoktsü akok, o ajanga alima nung rara adoktsü akok. Ajisuaka, ano iba küsa o ajanga nisung taküm kümzüksü akok, o ajanga lokti ka raksa-a aliba longjema akümtsü akok, aser o ajanga tsükchitepa aliba yimjung yanglur. Anungji asenoki o ya kanga kümdanga jembitsüla. Shia meteta lir ta ser tebilemtetba ajakbo mejembitsüla, tarutsü tia bilemdanga, tarutsü nung tetsüdaktsü majurutsüsa, lokti nung mepetmesu/mangatetep madokdaksütsüsa kanga kümdanga azüoka jembitsüla. Otsüla-oboula nungeri jembiba shin o ka..."Osu ajungerbo marokbang nung mayong tajung keter... Osu majungerbo marokbang nung nokpang keter". Tetezü...Osu tajung den sungo marok aser mayongtsü tajung kar, saka osu tamajung agibo nok agi pei kolak tangzüksüsa aazüker"... ta jembia aru. Otsüla-oboula nungeri tekong tesendang kechi atema aden ta jembia aru...Tetezü o tebilemtetba ajakbo jembizüka meyoki tekong tesendang tashi nungi meyokzüka/meyipa yoker...ta jembia aru. Ano, otsüla oboula nungeri yimjak nung, yim salang nung, mesura lokti senden nung, ken o tejembitet asa-a tali-tapong mejembi. Otsüla-oboula nungeri yimjak nung aser lokti-senden nung tangar aküm-metsübui ngasangadema mit adoka/ain adoka o kodanga mejembi, kechiyong aseni jembiba o-ji asen chirnur/semchisemnur dangi meyipa arua-lir ta, kanga kümdanga dang jembi. Aji oda, tiyazü o agi ochiji kodanga nembanga meyutettsü, kechiyong tiyazüji kopi meli-i pa sasa yimjak nung jungkai adoktsü.

Anungji asenoki asen bang nungi o mashi-mashi jembizüka meyoktsü kanga kümdangtsüla, kechiaser kechi ken o aseni jembizüka yoker...Iba o-ji tajung suaka, tamajung suaka, kenubo asen dangi meyipa arutsü. Ano ajak dang tekümdangtsü tulutibaji o meyipshia jembiba ya asütsü. O tajung agi tamajung kuma yanglur meyipshia jembiba agi loktiliba nung mangatetep adokdaksür. Shibai o mebilemdangi jembir pa/la-ji shisa maka, saka shibai kanga junga shisadanger, tejaklen-tesulen repranga, tarutsü tia indang kanga junga bilemdanga yimli o jembir, item nisung dangji tangateter nisung ta ajar. Ano ajak dang tekümdangtsü tulutiba kaji, lokti senden nung ken o jembidang... Shingaia ain adoka/mit adoka tangar dak temeyong agi tuita mejembitsüla. Shirnoki yamaji jembir parnok dangji mashi-malo nisung ta ajar. Shirnoki shia meteta lir ta ser tangar aküm-metsübui ngasangdema, asüküma, mezü-melema o tulu jembir, item chirnur/semchi-semnurji kenshi-oshir aser tashi-tawar mesoteter...ta otsüla-oboula nungeri takzü-takponga aru. Otsüla-oboula nungeri yamai jembia aru..."Par tetsü-tebou nungeri, mesura par tsüraburi ken o tali-tapong jembiba agi...Par chirnur aser semchi-semnur tejembitsü makar"...ta jembia aru. Atangji 'O' ya Tsüngrem lir, 'O' ajanga dang Tsüngremi alima rangben ya adokdaksü aser yanglu. Anungji asenoki o ya kanga kümdanga, azüoka aser kanga junga shisadanger dang jembidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Nicaragua nung sorkari Arogo dang ter-shilem nungi saru meshir



Nicaragua linük nung rally ka nung shilem agirtemi linük Tir, Daniel Ortega aser tatong Tir, Rosario Murillo na noksa amer jajadang tangokba noksa nung angur.

August 24, 2024: Tawa Nicaragua nung sorkari Arogo aser melungtet telok 1,500 anentsüba sülen maneni parnoki Arogo dang ter shilem (10-%) nungi saru meshir, ta osang ka ajanga metetdaksü.

Nicaragua linük nung Tir, Daniel Ortega aser tatong Tir, Rosario Murillo na leniba nung 2018 küm nungi tenzuka sorkari Arogotem aser Khristan lenirtem anema inyaker.

Tawa Nicaragua sorkari benokba mapatong balala ajanga Arogotem aser Arogo indang mission

mapatem nung mejungi kongshitsü.

Sorkari Arogo rejutem ano taliba azüoktsü nükjidong nung Arogo dang ter shilem tenla aser tenla balala nungi saru meshir.

Osang angazükba agi, Arogo dangi aruba ter shilem tenla nungi sorkari sorkari shilem 30 shi saru meshitsü.

Tir, Daniel Ortega-i August 20 nü Asamblea Nacional nung bill ka benokba sülen ajaki melungtepa iba bill ji agizükogo. Ortega indang

party, Frente Sandinista de Liberación Nacional ya 1970s nung guerrilla group ka ama tenzuka liasü.

2018 küm nüburtemi Ortega Tir menden nungi anentsü takhangba agüja longkak aitba sülen nungi sorkari parnok anema ola adokertem aser Arogo lenirtem anema inyaker tenzuka liasü.

Nicaragua nung Ortega-i aniba Sandinista National Liberation Front sorkari Mother Teresa's charity densema melungtet telok 3,000 dak tema anentsüogo.

Odisha nung Kandhamal district nungi Khristantem aika jenogo

August 24, 2024: Odisha state kübok Kandhamal district nung alir Khristantem aika tanga state-i jena ogo aser pei kidang nungi jena maoer Khristan aika tetsübu nung lir, ta International Christian Concern (ICC)-i metetdaksü.

Hindu nung putir ka asüba anogomong nungtem nung August 26 tashi Hindu nungertemi lokti senden ka agitsü sangdongba sülen Khristanatem aika jena ao.

Iba lokti senden ya Honibarnü tenzükogo aser Hombarnü tembangtsü.

Hindu nationalist organization temi Hindu nungertem dang iba lokti senden jagi longsoa arung aser raraba hadir bener arung, ta tayongzükba agütsü.

Hindu nungertemi Swamy Lakhmananand Saraswati asüba sülen küm 16 ajungba anogomong nungtem nung lokti senden ayongzükur.

Iba osang angashiba sülen Kandhamal district nungi pastor tem densema Khristantem aika jena ogo, ta ICC-isa metetdaksü.

Saraswati indang ali acre 8 nung aliba retreat center nungji Hindu nung lakh 5 shi adenshitsu imlar. Iba centre ya tribal nüsung aika aliba Kandhamal district kübok arem ka nung lir.

2008 küm August 24 nü mejangjaba nisungtemi Saraswati tepsetba sülen Right-wing Hindu nungertemi Khristantem dak melung melemi Khristantem anema apusoba sülen Khristan aika tepseta liasü. Iba kümji Hindu nungertemi Tenla kitem den ki 50,000 shi rongdoktsü aser Khristantem teimba ser nisung noklang aika tepseta liasü.

August 24 nü Hindu nungertem rally tenzüksü jelia "Shri Ram Sena Bharat" teloki social media nung posters aika prokshio. Shri Ram Sena Bharat telok yagi tribal Khristantem Hindu yimsü dangi meyipdaksür.

"Tribal nüsungtem nem o agi angatetdaksütsü merangtsü saka parnoki tashi mangara hadir amshitsüsa akümtsü," ta parnoki metetdaksüogo.

"Iba rally ayongzükertemi yimjak nung nisungtem dang pei kidang nungi raraba hadir bener arung ta public mike systems ajanga metetdaksüogo," ta Kandhamal district nung pastor, Albert Dugad-i International Christian Concern (ICC)-i metetdaksü.

Pastor Dugad-i, "2008 küm onok lendong nungi jenbua liasü, ajisüaka tanga parnoki kasa tensa bener arutsütsüa akok, kechiyong taküm June ita nung election agiba sülen Hindu-nationalistic Bharatiya Janata Party sorkar aruogo," ta metetdaksü.

Ano tanga osang ka ajanga ashiba agi, police-i Khristan ajak dang tensa azüoktsü atema parnoki mera ajak agiogo ta metetdaksüogo.

District police-i yimjung senden ka ayongzükba liasü aser iba senden nungji Hindu aser Khristan lenirtem dang kecha metsübuttsü metetdaksü, ajisüaka Khristantem ibaji mamangteti district nungi Khristantem aika jenogo.

ANO GO ABEN TSÜNGREM DEN

TSÜNGREM MULUNG CHIDAKTSÜTSÜ SARASADEMBA

Aser Tsüngrem metetba nung rena, mapa tajung nung tejang tanga aser ajak nung Kibuba temulung chidakja temsüa jajatsü asoshi onoki sarasademer. Kolosi 1:10

Iba temepishiba O ya tenyar Paul-i Kolosi nung aliba amangbapurtem dang yimlaba O tajungtem lir. Meimchiri Tsüngrem mulung chidaktsütsü Tsüngremer teyongyaba tulu lir, aji saka alima tatsüba aika agi mekütpanger aliba takümtemi aiben Tsüngrem metetba nung rena mapa tajung nung tejang tanga aser ajak nung Kibuba temulung chidakja temsüa mejajateter.

Asenoki temulungjang taroktiba agi sarasadema iba tashiji bener Tsüngrem nungi mepilai mapang ajak nung saksalema pa den lungjema lira tetendangba balala agi mekütpangyonga aseni ajakji tamang agi koktettsü. Yisu dak amanger ka taküm nung tepang agi masü saka mapa agi sayua asen mapa nung tejang tanga aseni amangba Tsüngrem mulung chidakja mamangtet tashi tenüng agi amangbapur ta angatetdi. Khrista den tsüngchi süa Pa mulung chidakja temoatsü ngua iba indang kuli tajung bener amangtsü nükjidong yudi.

Kohima Ao Baptist Arogoi angati health clinic ayongzükba agi



Kohima, Luroi/August 24 (TYO): August 24, 2024 nü Kohima Ao Baptist Arogo (KABA)-i Panchayat G.M.S New Ministers' Hill, Kohima nung tang mezüng angati health clinic ayongzükba agiogo, ta KABA, NMHF nung deacon, N Tekatoshi Ao-i sangdong ka ajanga metetdaksü.

Health clinic ji Honibarnep 7:00 ako nungi 9:00 ako tashi agi shiranger 131 (tetsür 76 & tebur 55) nem medical teyari den külemi nungdakba mozü balala angati agütsüogo.

Health clinic ji Dr. Imotemsu aser Dr. Achila Lanu na leniba nung agi.

Clinic nung department tenetji gynecology,

ophthalmology, surgery, medicine, family medicine, ENT aser Dental liasü. Clinic team nungji Chennai nungi ENT Specialist, Dr. Anu densema doctor 8 den nurse pongu, technician ana aser non-medical managerial staff temi yaritepa liasü.

Health clinic nungji temang anema alitsü atema yariba dang masü saka tanela tsütsülen nungia nungita prayer committee, KABA-i sarasadem agi yaria liasü.

KABA-i nüburtem tenzüksü atema inyaker aser tarutsü nunga maneni item ama sentongtem ayongzüksü tebilemba lir, ta kasa sangdong ajanga metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tamang

(n) mangu ser shitak lir ta bilemba (faith)

* Tsüngrem dak asenoki tamang agi amanger.

Tamanger

(n) Tsüngrem lir ta amangba nisung (believer)

* Yisu dak amanger tamanger kati tajung inyaker.

OLONG PAITEP # 6905

Grid for OLONG PAITEP # 6905 with numbers 1-16 in various cells.

TIPLIN

- 2. Auo nung chiyongtsü asenba
5. Mangyimba mapang
7. O tamendakdak
8. Pei dak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A ___ g
6. Mopung apodoka
9. Tongtipang tagitsü
10. Menungra bilem
11. Aiür
13. S ___ k
14. T ___ r

OLONG PAITEP # 6904 TELANGZÜBA

TIPLIN :

- 1. Pangka, 3. Aju, 5. Wai, 6. Lokti,
8. Sala, 10. Atamata, 13. Züin,
14. Akima, 16. Ano, 17. Ama,
18. Nungzü.

LANGTSÜNGLEN :

- 1. Penlok, 2. Awa, 4. Jakla, 7. Taten,
(tatentep), 8. Sutok, 9. Ama,
11. Anankü, 12. Rünem, 15. Hon.

NAI-A YA METETTER MA



Arishi küm 117 tain Maria Branyas Morera asüba sülen alima nung tantsütilaji Japanese tsür Tomiko Itooka lir ta Guinness World Records-i metetdaksüogo. Arishi küm 116 tain Tomiko ya Ashiya, Japan nung alir aser la May 23, 1908 nü Osaka nung aso. 2019 nungi la Ashiya, Hyogo Prefecture nung nursing home ka nung alir aser iba ya masüdang la arishi küm 110 tashi lar jala ana den külemi liyonga aru.

Tripura tzümetsüng nung yaritepdang TSR jawan ka asü



Agartala, August 24, 2024

(Agencies): Tripura tzümetsüng nung nisungtem kümzüksü merandang Tripura State Rifles (TSR) ka dena nisung ana asü.

"Belonia nungi Ashish Bose (TSR Jawan) aser Indranagar nungi Chiranjit Dey na tangar kümzükdang asü" ta Tripura Chief Minister Prof. Dr Manik Saha-i ashi.

"Tasütait nisung ana Ashish Bose (TSR Jawan) aser Chiranjit Dey na asüba atema temulung raksar. Tzümetsüng nung tangar kümzüksü merandang tena taküm sama. Parnok kibongtem aser medemertem den asükhu lemsateper. Tenati taküm agütsüba ajanga asenok ajungmesotsü imlar aser

tenati inyakba mapa kodanga mamatsü" ta CM Saha-i ashi.

Külen All India Congress Committee lennir aser MP Rahul Gandhi-ia Tripura nung nisung ana asüba atema mangyimba metetdaksüogo.

"Tripura tzümetsüng nung tasütait jawan ana asüba osang angashia temulung raksar. Tenati taküm bendanga agütsüba teti bilemtetsü. Tasür kibongtem den ni asükhu lemsateper. Iba ama mapang tamajung nung linüki nenok asoshi bilemtsüdar" ta Rahul-i Facebook nung ashi.

NDRF-i nisung 1479 anienogo

Tripura nung tzünglu kanga arua tzümetsüngba nung 1st Battalion National Disaster Response Force (NDRF)-i

August 20 nungi nisungtem kümzükba mapa inyaka arudar aser tanü tashi nung parnokni nisung 1479 kümzükogo.

"Trained rescue personnel telok 11 den rong tajung, deep diving sets aser life-saving equipment bener mapa inyaka arudar. August 23 tashi nung tzümetsüng timtem ajurua aliba tesemtem nungi nisung 1479 anienogo" ta NDRF sangdong ka nung ashi.

NDRF teloktemisa district administrations den yaritepa relief material agütsür aser nüngdakbapur keti essential supplies tongtsür.

"NDRF-i teti nisungtem yaritsü renema lir. Onoki Tripura nung tzümetsüng ajanga kongshia aliba nisungtem yarir" ta Commandant 1st Bn NDRF HPS Kandari-i ashi.

Mizoram-i senotsü khuret koktettsü atema Rs 1,955 crore apuogo

Aizawl, August 24, 2024

(Agencies): Mizoram nung senotsü khuret ketdangsütsü atema Chief Minister Lalduhoma-i aniba sorkari Reserve Bank of India (RBI) dang nungi Rs 1,955.19 crore apuogo.

State sorkari December 2023 aser taküm March tsüngda Ways and Means Advance kübok Rs. 793.7 crore apuogo ta ketdangsürtemi ashi.

Mizoram-isa yaküm

December nungi taküm July tsüngda open market nung Rs. 691 crore apu. Maneni sorkarisa Standing Deposit Facility (SDF) kübok Rs. 470.49 crore apu ta ketdangsürtemi ashi.

National Bank for Agriculture and Rural Development (NABARD) nungi Externally Aided Project (EAP) aser Special Assistance to States for Capital Investment (SASCI) kübok sen apuogo.

Mizoram nung senotsü khuret tulu ajurua lir aser Zoram People's Movement (ZPM) sorkari 2024-25 financial year ya senotsü khuret ajema akümtsü atema 'year of consolidation' ta sangoktsüogo.

Mizoram sentsüh mezüngdangtettsü saka March 31, 2024 31 tashi nung 'outstanding debt' ji Rs 12,709.29 crore liasü ta ketdangsürtemisa ashi.

Manipur nung KCP-N züngsem ka den prangpong-injang aika apu



Imphal, August 24, 2024

(Agencies): Manipur kübok Kakching nung telungpur ka apuba sülen prangpong-injang aika ngutetogo.

Ozüng alema sen saruba osang ka angazükba sülen Manipur Police-i Kakching district nung tesem ka mita aodang Kangleipak Communist

Party Nongdrenkhomba-(KCP-N) züngsem ka apu.

Iba nisung ya Wangkhem Sunil Singh (Tomba) ta jangjaogo aser pa ya Kakching area nung ozüng alema sen saruba nung shilem agir ka lir.

Iba sülen Centre aser state forces külem telok kati

Wangjing Khunou foothills nung mita aodang prangpong-injang aika ngutet.

Parnoki INSAS Rifle, 9mm pistol, hand grenades, INSAS Rifle live rounds, 9mm live rounds, helmet, detonator aser bulletproof vest ngutet. Item ajakji Wangoo police station ket nung agütsüogo.

US-i Ukraine nem ano military teyari talila agütsütsü



Tir Joe Biden (Achiji) aser Ukraine tir Volodymyr Zelenskyy (Abelen) na bilateral security agreement nung shigen asüba sülen tangokba noksa nung angur (File photo)

Washington, Luroi/August 24 (Agencies): Ukraine tir Volodymyr Zelenskyy aser US tir Joe Biden na phone ajanga sensaksemba sülen United States-i, Ukraine nem ano military teyari talila agütsütsü ta sangdongogo.

Pentagon-i Hokolbarnü ashiba agi, tang military teyari agütsütsü aliba ya USD million 125 alang asütsü. Biden-i ashiba agi, teyari nung air defence munitions, ammunition aser anti-armour missiles tem densema alitsü.

"Iba rara nung Russia-i takok mangutsü. Ukraine nungertemi takok angutsü aser United States aser onok den sendaktepa aliba linüktemi maneni parnok den jenjang ajak nung nokdaka alitsü," ta Biden-i ashi.

2022 küm February ita nungi Russia-i Ukraine amak tenzükba sülen US-i, Ukraine nem dollar billion aika alang military teyari agütsüogo.

Rara tembangtsü kecha timla maliba mapang ka nung tenündakba oset agi anüngba ajanga Ukraine nunger sepaitemi Russia nunger

sepaiteme memintokteti aruogo. "Tang agütsütsü nangzükere aliba hadirtem ya Ukraine-i kanga nüngdaka alibatem lir aser talisa yimitem, nüburttem aser tongtibang infrastructure tem kümzükka ayutsü atema air defence systems talila yoktsü aliba ya kanga tongtibang asütsü," ta Zelenskyy-i social media sangdong ka ajanga metetdaksü.

Rara tenzükba anogo nungi tenzükere tang tashi masetshi-i yariba atema pai Biden dang kanga pelaba lemsatep.

Ukraine nunger sepaitemi Russia indang litsü atsünga ia raraba mapang ka nung tang iba teyari agütsütsü sangdogogo. Russia kübok Kursk province nung tesem balala amak tenzükere tang hopta ana dak tali odar.

Ukraine nunger sepaitemi Russia indang litsü atsünga aiba ya Russia tir Vladimir Putin atema maksü aser takoksa lir, shibai long-distance weapon tem amshia maktetsüsa Ukraine nem tashi agütsüba atema US amala linüktem dak tai tongloksüogo.

Ukrainian Air Force

Commander Lieutenant General Mykola Oleschuk-i, Brestostibarnü video ka lemsatepba nung US-i agütsüba GBU-39 bomb amshia Kursk nung Russian platoon base ka amakba sayuogo.

Ukraine-i Russia telungi ia amakba ajanga mangatettep taliba küma aotsü ta ken o asadangertem karibo bilemer. Kasa mapang nung US-i ashiba agi, Russia kübok tesem balala amakba mapang parnoki Ukraine nem kecha teyari magütsü saka Russia nunger den raratsü atema dang prangbong injang aser hadir balala agütsür.

Hokolbarnü US sorkar kübok treasury, state and commerce departments-i Russia nem ano tenokdangba talila agütsüba sangdongogo, aser iba ajanga parnok nem tetsükdaksü talila agütsüogo.

Critics temi ashiba agi, US-i tenokdangba agütsüba ajanga Ukraine nung rara anendaksütsü atema sorkar bo mesotteter saka Russia nungertem anogoshia libaliro nung tetsükdaksü ajangshia arudar.

Pur or aliba Nigeria nunger medical kaketshir 20 chiokogo

Abuja, Luroi/August 24 (Agencies): Convention ka nung adentsü atema oya aliba mapang pur aoba Nigeria nunger medical kakethir 20 hopta ka dak tema lir chiokogo, ta police-i ashi.

August 15 nü kaketshirtem ya Benue State nung conference ka nung adentsü atema oya aliba mapang mejangjaba nisungtemi pur ao aser parnok alangzüktsü atema sen meshia liasü.

"Benue State kübok Ntunkon aremin nung yua aliba adianu aser adianutsürtem aser tanga Nigeria nunger kar chiokba onoki Hokolbarnü jangjaogo," ta Nigeria police otongdar Olumuyiwa Adejobi-i Honibarnü ashi.

State police-i sangdong ka ajanga ashiba agi, University of Maiduguri aser University of

Jos nungi kaketshir 20 chiokba jangjaogo.

Kaketshirtem ya senotsü kecha magütsü chiokogo. Adejobi-i ashiba agi, iba telok ya tasa kanga junga yanglur kümzükka liasü.

Linük indang police tekolakbai iba hopta Benue State-i, pur or alirtem kümzüktsü atema "tactical squad" ka yoka liasü.

Nigerian Medical Students' Association (NIMSA) secretary-general Fortune Olaye-ia, AFP news agency dang iba osang jangjatsüogo. "Onoki parnok den phone ajanga jembiogo. Parnok kümzükka lir," ta Olaye-i ashi.

Kaketshirtem ya bus ana nung mener oya aliba mapang Enugu nungi km 150 shi pilar Otukpo jila anasa pur oa liasü, kong mapangshia iba amala

mesükba lendong ataloka arudar.

Northern Nigeria nung ozüng alema inyaksangshiba teloktemi yimdaklirtem, kaketshirtem aser gari nung senzürtem senotsü meshia agitsü atema pua bener aoer, koba security forces temi menokdangteti arudar.

Nigeria nung küm shia nisung meyirejang aika sen atema pua bener aoer. Linük rongsenketzüng kanga mejungi akümba ajanga nisung pur aoba ken o tali küma odar, kechiyong nüburttem tawadadkak makai kümogo.

Nigerian consultancy, SBM Intelligence-i ashiba agi, Bola Ahmed Tinubu tir mendeni atuba sülen 2023 küm May ita nungi 2024 küm January ita tashi nung nisung 4,777 pur aoba mangaoka lir.

MULUNGNEN O

Onok asür **Temsula Toshi**'er kinungertemi, ojala 19.08.2024 nü ajungbena asüba mapang nenok shirnokisa onok shisatsü, nübu, rongsen aser sarasadem agi nungita yariogo nenok ajak dang kanga pelaba lemsateper. Nenok temeim, aria bilemba aser sarasadem ajanga mangyim jashi tia nung aliba mapang onok nem maneni anisüngzük agütsüdar. Tsüngremi nenok ajak moajangma.



Maneni onoki mejeta Lemjen Hospital Mokokchung nung doctor aser nurse tem dang kanga pelaba lemsateper.

- Temeim chirnur, semchisemnur aser anükapangtem.



Thailand kübok nüngutug asetkong Phuket nung anentsüh lendong nung asür nisung 10 jungogo, ta ketdangsürtemi Honibarnü metetdaksü. Hokolbarnü anentsüh aliba sülen nisung asem tang tashi monguteti lir aser nisung 19 yiruogo.

BGB-i taoba Supreme Court obendanger ka sota ayu

Dhaka, Luroi/August 24 (Agencies): Bangladesh indang Supreme Court nung taoba mapang obendanger ka Sylhet arrtsü aden India-i jena aotsü meranga lia sota yuogo, ta Border Guard Bangladesh (BGB)-i Hokolbar aonung menor metetdaksü.

Awami League lenir ASM Firoz, par kidang apuba sülen ghonda ishika dang lir iba onsag ya agizüka liasü. BGB headquarters-i SMS ajanga osangbenertem dang taoba mapang Supreme Court indang apex appellate division obendager Shamsuddin Chowdhury Manik, Sylhet kübok Kanaighat arrtsü len nungi India-i jena aotsü meranga lia sota yuogo, ta ashi.

Prothom Alo osang kaket sangdong ka ajanga ashiba agi, Manik ya BGB outpost nung ayaterem tashi yua liasü. Bangladesh nung sorkar mapa tali mekazüka toktsüba anema kaketshirtemi longkak aitba maziükteti mepetmesü tulu adoka taoba PM Sheikh Hasina-i aniba sorkar chirepa la August 5 nü India-i jena aoba sülen linük tang mepetmesü tulu nung lir.

Iba masüadang July tom nungi sorkar amena longkak aitba mapang nisung 500 dak tema tepsetogo. Nobel laureate Muhammad Yunus interim sorkar indang Chief Adviser mapa abentsü August 8 nü tenangzüktepa agiogo. August 5 nü nungi tenzükka minister tejentem densema taoba sorkar

dak sendaka alirtem aika puogo aser parnok aika nisung tepsetba atema aitsür lir.

Bangladesh Army-i taoba mapang ashiba agi, Hasina-i aniba Awami League party lenirtem noklang aika aser tangartem cantonment tem nung jenoka lir, kechiyong parnok taküm lendong bang nung lir.

Taoba law minister Anisul Huq aser taoba PM indang private sector affairs adviser Salman F Rahman na mezüngbuba Dhaka indang river port Sadarghat terminal nung pua liasü. Tena ya rong ka nung mener jena aotsü meranga liasü.

Taoba foreign minister Hassan Mahmud aser former social welfare minister Dipu Moni, MP tem aser Awami League lenirtem aser parnok den sendaktepa alirtem densema Hasina lenisüba kübok cabinet zügsemtem aika puogo. Pur alirtem rongnung pro-left Workers Party mendenbuba Rashed Khan Menon aser mapa nungi anentsür aliba military aser civil ketdangsürtem densema lir.

Mapa nungi anentsürtem rongnung ano major general Ziaul Hassan, shiba sorkar indang telecommunications system tekolakba liasü pa den Chittagong Port Authority chairman rear admiral Mohammad Sohail-a densema lir. Maneni TV journalist Farzana Rupa aser la kinungbo Shakil Ahmed nata puogo.

Dhawan international aser domestic cricket asaya nungia anener



Social media nung video ka ajanga Dhawan-i pa international asaya aser iba den domestic cricket asaya nungia anentsü telemtetba agiba sangdongogo.

Luroi/August 24, 2024 (Agencies): India nunger nungtugu opener Shikhar Dhawan-i Honibarnü pa international cricket asaya nungia anenba sangdongogo.

Social media nung video ka ajanga Dhawan-i pa international asaya aser iba den domestic cricket asaya nungia anentsü telemtetba agiba sangdongogo. Pai 2010 nungi 2022 küm tashi nung India tenüing nungi Test asaya 34, ODI 167 aser T20I 68 nung asayaogo.

"Ni nukjidong ka dang liasü aser aji India tenüing nungi asayatsüba liasü aser ni iba nukjiodong tongtetogo. Kü indang career nung nisung aikati teyari agütsüogo aser iba atema ni kanga pelar. Tamasa onok kibong dang kanga pelar. Ni lanuwa coach asür Tarak Sinha, aser Madan Sharma na danga kanga pelar. Tena dang nungi ni

iba asaya angazüka liasü," ta Dhawan-i ashi.

"Ni kü teammate tem danga kanga pelar, shirnok den ni cricket mapang talangka asayaogo. Ni ano tanga kibong ka nung shilem ka kümogo, ni konang tetushi nguogo aser fan temi kü dang temeim sayuogo aser iba atema kanga pelar," ta pai ashi.

"Otsü ajunga züngma azüngtsü atema page lapokyonga aotsüla ta shin o ka nung shia lir, aser tang ni iba shin o ama inyaksü. Ni international aser domestic cricket asaya nungi anenba sangdongogo. Ni yimjung nung asaya nungi anener, kechiyong ni linük atema aiben asayaogo. Kü nem asayatsü atema maongka agütsüba atema BCCI aser DDCA dang kanga pelar. Maneni fan tem danga kanga pelar, shirnoki kü dang temeim sayuogo," ta paisa ashi.

"India tenüing nungi masayatetsüsa jenjang kati aruba atema kü sasa dang jashia tebilem ta shia arudar, kechiyong ni India tenüing nungi mapang talangka asayaogo," ta Dhawan-i ashi.

Australia den Visakhapatnam nung asayaba mapang 2010 küm mezüngbuba asayaba sülen Dhawan-i international cricket nung run 10,000 dak tema yangluogo.

Pai century 24 yangluogo kong ODI nung century 17 aser Test asaya nung century 7 yangluba densema lir.

Dhawan ya India team-i 2013 küm ICC Champions Trophy akokba mapang kanga tongtibang asayar ka liasü.

Iba asayamung nung pai asaya 5 nung run 363 yanglua pai ajak dang nungi run timba yanglu, kong century ana aser half century ka densema liasü.

Asian Games atema India nunger surfer temi tang mezüngbuba quota ngutetogo



Kishore Kumar (File photo)

Luroi/August 24, 2024 (Agencies): India-i tang mezüngbuba 2026 Asian Games nung surfing tetoktepba atema quota ngutetogo. Iba asayamung ya Aichi-Nagoya, Japan nung asayatsü aser tetsür aser tebur team napronglai quota kaka ngutetogo.

Maldives nung Asian Surfing Championships nung shilem agiba mapang quota ya surfer temi bendenba ranking points dak ajemdaker agütsüogo.

Honibarnü kanga meranga toktepba sülen Kishore Kumar semifinal tonga atu aser tera agi dang takok mongutet. Pa Round

1, Round 3, aser quarter-finals nung mezüngbuba jenjang nung tembangba sülen India atema Asian Games quota ka nguteteta liasü.

Semi-final Heat 2 nung Kishore-i 8.26 anguba sülen pa tasembuba jenjang nung tembangba liasü. Iba tetoktepba nung China nunger Chengzheng Wang (10.00) tanabuba aser Japan nunger Taro Takai (14.50) mezüngbuba jenjang nung liasü.

Asian Surfing Championships ya Asian Games atema qualifier ka lir aser iba asayamung nung India nunger

surfer ti-i category pezü nung shilem agia liasü.

Kasa mapang nung Harish Muthu ya India nunger rongnungi Asian Surfing Championships nung quarter-final tonga asayaba mezüngbuba asayar aküm, saka pai takok tajung mongutet.

"Tanü otsüsütsüsa India nunger surfer temi taruba Asian Games atema quota ngutetba ya jangrademtsüka. Küm aika surfer tem, coach tem aser federation-i temlungtetba tulu nung kanga meranga inyaka aruba ajanga iba jenjang ajangzüketetba kuli agütsür," ta Surfing Federation of India tir Arun Vasu-i ashi.

"Tarutsü nung India nunger surfer temi Olympics nunga shilem angitsü ta temlung lema bilemer. Kishore final tonga atu asüba kanga jungla saka pai kechi ajangzüketetba iba atema onok kanga nema adanger, kechiyong pa sempet tajung aketba lanur ka aser pa dak temlungtetba tulu lir," ta paisa ashi.

Mohammedan Sporting Club Indian Super League nung asayatsü

Luroi/August 24, 2024 (Agencies): Indian Super League (ISL)-i, sangdong ka ajanga 2024-25 season nungi tenzüka Mohammedan Sporting Club (MSC) league nung asayatsü ta metetdaksüogo.

Iba club ya linük nung club tejentiba rongnung ka lir aser parnok tang Indian Football top tier nung asayatsü.

MSC pur ISL nung asayatsü atema ajungkettsüba sülen League nung team 13 kümogo. Parnok ya ISL nung asayatsü atema ajungkettsüba tanabuba club lir. Taoba season kanga junga asaya parnoki 2023-24 I-League title abenba sülen tang parnok ISL nung asayatsü atema maongka ngutetogo.

Taoba season Mohammedan SC puri ajak senteper point 52 angu, kong asayar 15 akokba aser tenet draw asüba densema lir. Domestic season nung parnok asaya ana nung dang tamakok angu. Parnoki goal 44 idaktsü aser goal 22 dang chia liasü.

Mohun Bagan Super Giants aser Emami East Bengal FC na ISL nung adenba sülen tang Mohammedan SC iba league nung adenba ajanga parnok ya

Kolkata nungi iba lengue nung asayaba team tasembuba kümogo.

Kolkata ya India nung football asaya kanga meimba yimti ka lir. Iba yimti nung mapang talangka nungi football kanga sakloka asaya arur aser league balala nung tokteptsüsa club aika adokogo.

2024-25 ISL season nung asayatsü aliba club tem rongnung; Bengaluru FC, Chennaiyin FC, FC Goa, Hyderabad FC, Jamshedpur FC, Kerala Blasters FC, Mumbai City FC, NorthEast United FC, Odisha FC, Punjab FC den Kolkata nungi club asem Bagan Super Giant, East Bengal FC aser Mohammedan Sporting densema lir.

Mohammedan SC pur AFC Champions League Two nung asayatsü asoshi maongka angutsü akok. AFC Champions League Two ya Asian Football Confederation-i ayongzükba second-tier asayamung ka lir aser MSC-i domestic season kanga junga asayatetra parnok iba asayamung nung asayatetsü.

Taküm ISL September 13 nü nungi tenzüka asayatsü.

Leicester-i Palace forward Ayew alizükogo

Luroi/August 24, 2024 (Agencies): Leicester-i Ghana nunger forward Jordan Ayew Crystal Palace nungi pound million 5 shi yong alizükogo. Pa den küm ana atema tenangzüktepba yangluogo.

Ayew, shiba Palace nung 2018 küm loan nung oa adenba sülen küm trok tashi asayaogo, pa ajanga Leicester pur attacking tali tashi taitba kumdaktsütsü.

Palace nungi pai asaya 212 nung asayaogo aser iba mapang goal 23 idakja liasü. Deobarnü Brentford pur goal 2-1 agi makokba asaya nung pa asaya tanabuba shilem nung substitute ama ia asaya.

Arishi küm 32 tain asayar, shiba indang fee pound million 8 akümtsü akok, pa Leicester puri alizükba asayar tesüsububa kümogo. Parnoki iba hopta tetenzüklen Tottenham nungi midfielder Oliver Skipp pound million 20 agi alizükogo.

Leicester coach Steve Cooper-i, pai aniba team nung forward tem tali anoktsü atema pa sentong aliba jangja jangja metetdaksüogo.

"Ni idaki aruba atema kanga pelar aser nema adanger. Ni club dang kanga pelar, kechiyong parnoki ni alizüktsü atema kanga meranga



Jordan Ayew

inyakogo. Maparen kanga kara tembanga inyakogo aser ni idaki arutetba atema kanga pelar," ya Ayew-i ashi.

"Asayar ka ama manager kati na aginer ta angashiba mapang onüa bilemer aser pa kükob inyaka renloka oner.

"Ni arishi küm 32 süaka asayar ka ama maneni angazüka renloka oner. Ni meranga inyaka team nukjidong atongtsü asoshi teyari agütsütsü atema aru.

Premier League season tasenba nung Leicester pur Hombarnü Spurs den mezüngbuba asaya goal 1-1 agütsür tembangba liasü. Asaya nung goal ka ya Jamie Vardy-i idaktsü. Parnok taruba asaya Fulham den asayatsü.

BILEMDANGANG

"Na koloni aor mejangjaba nisungtem nem len tesayudaktsü."